



Sabtu, 29 Juni 2024
Ogen : 2 Samuel 7:29



Kesusuren Si Ipasu-Pasu Dibata



Latih erbintuas, suari ras berngi pe igengken orang tua alu sada arapekn maka kesusurena ngenanami kegeluhen si terulin pagin asangken kegeluhenna. Toto si ipenangkih e me segelah anak-kempu ngaloken kesangapen rikut ras kinijuah-juahen. Si enda jadi arapen si lit i bas teptep orang tua. Lit istilah maka anak e me "buah bara." Semalna anak e tupung kitik denga mekatep itamaken bapa i datas barana.aminna pe anak e kitik denga tapi itamaken datas bara maka anak enda jadi ganjangen asangken bapana e. Arah kai silakoken enda nuriken pengarapen maka anak e pagi banci min ganjangen, ulin kegeluhenna asangken orang tuana. Bagenda me kerina toto orang tua nandangi anak. Daud sekalak orangtua. Bas ia lit kuasa sabap ia me raja si merentah bangsa Israel tupung si e. Ia bayak namura, dengen enterem suruh-suruhenna. Secara doni banci kataken kai pe la lit si kurangna i bas Daud. Anak-anakna entah sinursurna pe enterem nge. Aminna gia la alit si kurangna, Daud tetap ertoto man Tuhan. Igejapkenna maka kuasa Dibata e lebihen asangken kerina kuasa si lit i babo doni enda. Dibata e erdolat kel. Erdandanken si e man baNa saja Daud mindo, ertoto. Terkusus pemindonna e me kerna sinursurna, maka i pasu-pasu segelah lalap ngenanami kiniulin Dibata. "Tadinglah lalap pasu-pasuNdu i babo kesususrenku" nina Daud bas pertotonna. Teridah maka Daud ngakui Dibata e ulu pasu-pasu. I bas Dibata nge maka inanami kerina kiniulin i babo doni enda. E maka arah totona pe i babana sinusurna segelah malang dengen mehamat man Dibata segedang geluhna. Wari enda iperingeti hari keluarga nasional, si mabai kita ras se isi jabuta mehamat man Dibata. Sabap jabu si mehamat man Dibata nge si ngenanami simpar pasu-pasu Tuhan. Jadi tegu-tegulah se isi jabuta segelah ngenanami ulina Dibata e.

☞ *"Toto orang tua e me sinursurna ngaloken kesangapen"*



